

**EKALESIA FAAPOTOPOTOGA KERISIANO I AMERIKA SAMOA  
OFISA O A'OA'OGA KERISIANO**



**VASEGA MATUTUA**



**AUKUSO - TESEMA**

**2021**

VASEGA: MATUTUA (2021)

ASO

FAASOLOGA O MATAUPU

ITULAU

**MANATU TAITAI O AUKUSO: “O TAGATA NA SAVAVALI I LE POULIULI”**  
**(The people who walked in darkness.)**

- |                    |   |   |
|--------------------|---|---|
| 1. Aukuso 08, 2021 | “O LE SULU MO O’U VAE” (The lamp for my feet).                                      | 1 |
| 2. Aukuso 15, 2021 | “PE A LEAI SE ALOFA, E MAUA I FEA SE LELEI?”<br>(Without mercy, where is goodness?) | 2 |
| 3. Aukuso 22, 2021 | “FANUA LANULAUAVA E FAAMALIE LOTO”<br>(A green and pleasant land).                  | 3 |
| 4. Aukuso 29, 2021 | <i>SUEGA 1: MO LE MASINA O AUKUSO</i>   | 4 |

**MANATU TAITAI O SETEMA: “AMATAGA O SE LAASAGA FOU”**  
**(A new phase begins.)**

- |                    |  |   |
|--------------------|--|---|
| 5. Setema 05, 2021 | “AUINA MO LE FEAU” (Sent on a mission).                    | 5 |
| 6. Setema 12, 2021 | “FIAFIA INA UA AMANAIAINA” (Excitement of inclusion).      | 6 |
| 7. Setema 19, 2021 | “ALOFA TUNOA SILISILI O LE ATUA” (God’s astounding grace). | 7 |
| 8. Setema 26, 2021 | <i>SUEGA 2: MO LE MASINA O SETEMA</i>                      | 8 |

**Malologa ma tapenaga mo le Lotu Tamaiti: Malolo mo le masina atoa.**

**MANATU TA’ITA’I O NOVEMA: “OU TE TULA’I ATU NEI” (Here I stand).**  
**Faamanatuina le 504 tausaga Matini Luteru (Martin Luther’s 504 Anniversary).**

- |                     |   |    |
|---------------------|---|----|
| 9. Novema 07, 2021  | “O LE ALOFA TUNOA UA TATOU TUTU AI.”<br>(This grace in which we stand). | 9  |
| 10. Novema 14, 2021 | “PE A MOE MITI TOA MANUMANU”<br>(When superheroes dream).               | 10 |
| 11. Novema 21, 2021 | “O ALA O LE AGAGA.” (The way of the spirit).                            | 11 |
| 12. Novema 28, 2021 | <i>SUEGA 3: MO LE MASINA O NOVEMA</i>                                   | 12 |

**MANATU TA’ITA’I O TESEMA: “FEAGAIGA MA FOLAFOLAGA”**  
**(Covenants and promises).**

- |                     |                                     |       |
|---------------------|-------------------------------------|-------|
| 13. Tesema 05, 2021 | “O SARA MA MARIA” (Sarah and Mary). | 13    |
| 14. Tesema 12, 2021 | <i>SUEGA FAAI’U O LE TAUSAGA</i>    | 14-15 |

**MANATU AUTŪ O AUKUSO: “O TAGATA NA SAVAVALI I LE POULIULI”**

**AUKUSO 08, 2021**

**MATAUPU 1: “O LE SULU MO O’U VAE” (The lamp for my feet).**

**TUSI FAITAU: ISAIA 9: 1 - 7**

**SINI: Ia malamalama le fanau i ala o le Atua, na te lē tuulafoa’iina se tagata e savavali i le pouliuli.**

**Fesoasoani mo faiaoga:** E faatalofa atu i faiaoga o le vasega matutua o lenei afa tausaga i la tatou Aoga Aso Sa. Malo le onosa’i ma le faamalolosi i tiute ma tofi ua valaauina ai i tatou e le Matai o le galuega. E ao lava ona toe faamanatu i fanau mea e tataua ona latou aumaia mo le aoga, mo nisi e fou mai i la tatou vasega matutua; ua tau lē faatonuina i ia tulaga. Ia taumafai e faamalosi pese o Aoga Aso Sa i lenei tausaga aoga, e mafai ona faaaoga i ai fanau e i ai le taleni faa-musika ma fiafia e pepese mo le Alii. E mafai ona saili fesoasoani i le au Asafo.

Ia mulimulita’i pea i le manatu autū o le masina o Aukuso; ‘*O tagata na savavali i le pouliuli.*’ Ia manino i le tala o le sese lea o le nu’u o le Atua ua mafua ai ona o’o i le tafeaga. Peita’i, o ala o le Atua e lē tu’ulafoa’iina ai le tagata. O le uiga lena o le mataupu; ‘*o le sulu mo o’u vae,*’ e saunia lava e le Atua sulu a’o le malamalama mo ala e savavali tonu ai le tagata. O le uiga o le manatu; e lē mafai ona tuuina le tagata i se ala e lē gafatiaina ona savali ai.

**Fesoasoani mo le Mataupu:** O le Afioga a le Atua ua ala mai i perofetaga o le Feagaiaga Tuai, ua faia lea ma lamepa susulu a’o se malamalama taua mo le tagata po o fanau a le Atua i le tala faasolopito. O le mataupu e 9 lenei o le tusi a Isaia; e faigofie ona faafeso’ota’i i tusitusiga a le perofeta ae le’i faatafeaina le nu’u. Ma o lea ua faailo le mafuaga o le faaaogaina e le Atua o ia nu’u faapaupau e a’oa’iina ai lana fanau mai a latou amio leaga ma le lē usiusita’i. O loo faailoa mai ai, o le tafeaga ua avea ma sasa a’o se a’oa’iga i le nu’u o le Atua ona o le savavali i le pouliuli. Peita’i, o loo totogo a’e ai ma le ata o se faamoemoe ola mo le Isaraelu. O loo manino ai le valoaga o le Mesia e le perofeta pei ona i ai i le tusi faitau. O le ata e autū i le pule aoao a le Atua ma lana fuafuaga mo le tagata; e ala i a’oa’iga po o le manuia e faavavau.

**Tauloto:** *Isaia 9:6; Auā ua fanau mai mo i tatou le tama, ua fofai’ina mai mo i tatou le atalii, e i lona ua le malo, e igoa foi o ia, o le Silisili ese, o le Faipule, o le Atua malosi, o le Tamā o le faavavau, o le Alii o le filemū.*

**A’oa’oga:**

- Aua ne’i mama ia te oe le alofa mutimutivale ma le faapalepale o le agalelei o le Atua.
- E ui ina sasa ma a’oa’i le Atua pe a sese le tagata, ae saunia pea sulu mo le malamalama.

**Galuega Faatino:**

- ❖ Ia vavae ini vaega se 2 le vasega; e tau faamatala atili ai le eseese o le savali i le pouliuli ma le savavali i le malamalama; fai ni faata’ita’iga.
- ❖ Ia ta’i 2 sulu a le tamaitiiti o le vasega mo vae pe a savavali i le pouliuli.

**Pese:** *Alaga le si’ufofoga o le Leoleo mamoe, i fafo o le pogisa po o fea o i ai?*

**Tatalo:** Ia faamanatu mai pea lou alofa taumulimuli i lau fanau, e lē mafai lava ona e tuulafoa’i so i matou i le faafanoga. Amene.



**MANATU AUTŪ O AUKUSO: “O TAGATA NA SAVAVALI I LE POULIULI.”**

**FEPUARI 15, 2021**

**MATAUPU 2: “PE A LEAI SE ALOFA E MAUA I FEA SE LELEI?”**

**(Without mercy, where is goodness)?**

**TUSI FAITAU: ISAIA 12: 1 - 6**

**SINI: Ia manino le vasega e leai se mea e faigatā i le Atua, e leai fo’i se mea e sili atu le alofa po o le lelei nai lo le Atua o loo tatou talitonu i ai.**

**Fesoasoani mo faiaoga:** E i ai le alagaupu masani; ‘E lelei le Atua – i taimi uma.’ O le tasi o natura faaalai o le Alii, ‘o le Atua o le alofa lava Ia’, ua na o Ia foi e moni ai le lelei. Po o a lava ala e uia e le tagata, o a foi fitā ma faafitauli e oo mai, e lē mafai ona leaga ai le ola o le tagata auā o loo lotolotoi faatasi ma le alofa a le Atua. O le tagata ua pese ona o le fiafia, ua alaga leo tele foi ina ua leai se mea e fefe ai ma ua mautinoa le ola i ona aao alofa. O le manatu laualuga lea o le perofeta pei ona tusi atu mo le Isaraelu; i lo la vā tapuia ma le Atua e to’atasi. Po o a faalētonu ma ni fatia ua sola; e lē liliu ai le alofa o le Atua i lana tagata. Ia faamanatu pea i le fanau, e pule aoao le Atua i ona aso, tau lava o lo tatou faafetai ma faafoi atu le viiga ia te Ia.

**Fesoasoani mo le Mataupu:** O le manatu lea o loo laualuga i le perofeta pei ona tau faamanatu atu i le nu’u o le Atua, ae le’i tu’ua Kanana ina ua faatafeaina. O le pese faafetai a le Isaraelu ona o le Atua ua mafua ai ona lelei ma atoatoa le ola. O le faafetai ina ua manino i le ataata o le tauleleia po o le faaolataga ua i ona luma lea mai le Atua. Ua atoatoa le ola ina ua mautinoa ma maua’ā le talitonu i le Atua o manuia o loo latou malaga faatasi. Le paia o Isaraelu e, ia paia oe auā e paia lo outou Atua silisili ese. E pei o se faamalosi au a’o le taosoina o le nu’u o le Atua, ae le’i o’o i puapuaga ma le nofo pologa i malo tu tuaoi. I le f. 3 fai mai e te utuvai ma le olioli vaipuna o le faaolataga, o lagona fiafia o le Isaraelu, auā ua mautinoa e lē mafai ona galala pe fia inu i nu’u naumati o le a nofo pologa ai auā e i ai faatasi ma le Atua o manuia.

**Ia faamalamalama uiga o upu o le Tusi Faitau:**

- ✓ Totama’i: O le ita; lē fiafia po o le to’asā.
- ✓ Faamatalaloto: O le faamalamalamaina o se mataupu ina ia manino ai le loto.
- ✓ Faaolataga: O le galuega a Iesu Keriso na valoia ai e perofeta.

**Tauloto:** *Isaia 12: “Alaga ia, ia leo tele ma le fiafia, o oe o lē nofo i Siona; auā e silisili ese le Paia o Isaraelu o lē o afio i totonu ia te oe.”*

**A’oa’oga:**

- Aua ne’i fesiligia pe masalosalo se tagata i le lelei ma le alofa o le Atua i le tagata.
- Ina pepese ia ma alalaga leo tele i le Atua ona o lona alofa e faavavau lava lea.
- O le Atua e sili lona alofa ma le lelei i le tagata, peita’i e sasa ma a’oa’i foi pe a sese.

**Pese:** Tusi Pese # 189: Ia alalaga i le Atua...

**Tatalo:** Ia faamanatu mai pea o matou tiute i aso uma o lo matou ola; ina ia vivi’i ma faafetaia lau Afio e faavavau ona o le alofa ma lou faamaoni e lē aunoa. Amene.



**MANATU AUTŪ O AUKUSO: “O TAGATA NA SAVAVALI I LE POULIULI”**

**AUKUSO 22, 2021**

**MATAUPU 3: “FANUA LANULAUAVA E FAAMALIE LOTO”**

**(A green and pleasant land).**

**TUSI FAITAU: ISAIA 24: 1 - 15**

**SINI: Ia malamalama le fanau i le lelei ma le faamalie loto o lona alofa, a usita’i ona lanulauava lea o fanua ma sa’afi i le matagofie o le Atua.**

**Fesoasoani mo faiaoga:** Ia fai se ata faatusa mo le fanau, pe afai ae ave faa tagata-o-tauaina lo latou malo e nisi o malo o le lalolagi. O le a so latou lagona pe afai o le a faa pologaina ma olopalaina e nei malo faapaupau? O le a lē toe tutusa le nu’u aemaise lona laueleele ma le mea na masani ai ona tagata. A’o se lapataiga tele lea mo le nu’u o le Atua; ina ia faalogo ma usita’i e lanulauava ma lausiusi ai lona laufanua ma le laueleele. O le a lē toe i ai se fiafia ma le olioli i le nu’u ua faatafunaina; o le fanua na masani ona lanulauava e faamalie loto ua mou atu ma ua lē toe vaايا. O le matagofie lena o le Atua ma ona fanua lanulauava e fiafia ma olioli ai tagata nu’u, auā o le ola ua faamalieina ai le loto. O le Atua e liliua le ata o le faanoanoa i le fiafia pe a usitai.

**Fesoasoani mo le Mataupu:** O le faamanatu a le perofeta o loo manino i le ulua’i fuaiupu o le tusi faitau; ‘o le a sasaina e le Alii, faafaōina, ma faataapeapeina’ lona nu’u ona o le lē usiusita’i. E pei o le aso o le Alii ua o’o mai ai lana fetalaiga ona o le lē tausia o ana tulafono. I le f.7; ‘ua faanoanoa le sua vine, ua mavae le fiafia i topa; ua mapuitiga i latou uma e sa olioli o latou loto,’ o lona uiga ua lē toe i ai se fiafia po o se lausiusi o le fanua, ua mavae atu le olioli ua alu ese le fiafia o le nu’u. O le fuaiupu e 5 o loo taoto ai le mafuaga tonu o le faatafunaina o le nu’u ma ua lē toe lausiusi ma lanulauava ai le fanua. ‘O le nu’u ua leaga ina ua latou solia tulafono, ua latou liliu ese le sauniga; ua latou solia le feagaiga e faavavau.’ E tasi lava le tali o nei faafitauli, ‘ia toe fo’i mai i le Atua ma sola ese mai i le tiapolo ma ana mailei; e maua ai le fiafia moni.

**Tauloto: Isaia 24: 15; O le mea lea ia outou vivii atu ai i le Alii i le afi, i nuu tuloto i le sami, o le suafa lava o le Alii o le Atua o Isaraelu.**

**A’oa’oga:**

- O le Atua e tuu avanoa; ae e i ai lava lona taimi ma le ‘aso o le Alii pe a soli i tulafono.
- Ia tumau le fiafia ma le olioli i le Atua e maua ai faamanuiaga e tele ma le matagofie.
- Ua na o le Atua e lanulauava ma lausiusi ai fanua; e moni ai le fiafia ma le olioli o le ola.

**Upu ma o latou uiga:**

- ❖ Faataapeapeina: O se mea ua faa-malepe, taapeape ma ua faa-salalauina.
- ❖ Mamae: O le laau ua fai ifo lona ola po ua tau mate.
- ❖ Faatafunaina: O le aai po o se laueleele ua susunuina ma ua tuulafoa’iina.

**Pese: 353: Lota nu’u moni, ta te fiafia ai..**

**Tatalo:** Ia faamatala-loto lau Afio i fanau ia; o lou lelei ma lou silisili ese, ina ia tutumau ma maua’ a ai le talitonu ma le faatuatua i lou Malo e faavavau. Amene.



**“MANATU AUTŪ O AUKUSO: “O TAGATA NA SAVAVALI I LE POULIULI.”**

**SUEGA MO LE MASINA O AUKUSO**

**AUKUSO 29, 2021**

**TUSI FAITAU: ISAIA 9: 1-7 / ISAIA 12: 1-6 / ISAIA 24: 1-15**

**Fesoasoani mo faiaoga:**

**Mataupu 1: fesili 1–4 / Mataupu 2: fesili 5–7 / Mataupu 3: fesili 8–11.**

**Fesili ma Tali** (pule lau susuga pe sui fesili/o tali foi ia e mafai ona e faaopopo i ai).

1. O le a le uiga; ‘o e na savavali i le pouliuli lea ua pagatia ai le lumana’i? **T:** Ioe, e i ai taimi e lē iloa ai o tatou sese, ae faamanatu mai ina ua faasalaina i tatou e le Atua.
2. I le mataupu e 9 o le a le manatu o le tusitala ia Isaraelu? **T:** O le vaitau o loo aeaie le manuia o le nuu o folafolaga, ua agasala ma solia tulafono ma poloaiga a le Atua.
3. O le a se faamanatu mai le tusi faitau? **T:** Afai e faateteleina le agasala ma lē toe taliu i le Atua, o le a taia ma faatafeaina pei o se nu’u ua tuulafoa’iina.
4. I le f. 6 na tauloto, o ai e faatatau i ai lea valoaga? **T:** O le faamoemoe ola lea mo le Isaraelu pe a o’o le tafeaga; e manatu le toatele o le valoaga o le Mesia e Isaia.
5. O le a le uiga; ‘pea leai se alofa e maua i fea le lelei? **T:** Ua na o le Atua e tonu ai lea faaupuga; ‘auā o le alofa lava Ia ma e silisili lona lelei i mea uma e manatu i ai.
6. O le a se faamanatu i le va o Isaraelu ma lona Atua? **T:** Po o a mea e tutupu, o fea foi e o’o i ai vae o le Isaraelu, ia alalaga ma pepese leo tele auā e silisili ese lona Paia.
7. O le a le uiga; ‘ou te utuvai ma le olioli i vaipuna o le faaolataga? **T:** O a fita ma faigata e o’o mai; o le Atua lava e malie ai le galala i le ola faa le agaga ma le faaolataga.
8. O le a le mea o le faia e le Atua ia Isaraelu pei ona faamanatu Isaia? **T:** O le a sasaina e le Alii le nuu ia uma, na te faafaōina, na te faataapeapeina foi e o nonofo ai.
9. O le a se mea o loo faatusa i ai e Isaia; ‘ua faanoanoa le sua o le vine, ua sasaina ifo le olive ma ua faavaivai le vine? **T:** O loo faatusa e Isaia i le fanua ua mamae ma ua leai se lanulauava, ua leai se fiafia ma le olioli loloto na masani ai auā ua o ese mai tulafono ma poloaiga a lo latou Atua e to’atasi.
10. O le a se faamanatu, pe afai e tausia ma usitaia tulafono a le Atua? **T:** Ua pei o se fanua lanulauava, e maua ai le fiafia moni ma e faamalie loto.”
11. O le a se isi a’oa’oga o lenei mataupu, i le va o le fanua lanulauava ma le tafeaga? **T:** Ioe, a tumau ma faatuatua i le Atua e lē o’o i le tafeaga ae maua le fiafia ma faamanuiaga e faavavau.

***Ia manuia tele le faigā-suega o lenei Aso Sa.***



MANATU AUTŪ O SETEMA: “AMATAGA O SE LAASAGA FOU”

SETEMA 05, 2021 “ASO SA O LE TALALELEI”

MATAUPU 4: “AUINA MO LE FEAU” (Send on the mission).

TUSI FAITAU: GALUEGA 13:1 - 15

SINI: Ia malamalama le fanau o i tatou o avefeau ua auina atu e molimoli le finagalo po o le feau a le Atua i tuluiga uma o le lalolagi.

**Fesoasoani mo faiaoga:** Ua talafeagai le mataupu ma le taua o lenei Aso Sa faapitoa; le Aso Sa o le Talalelei’. Ia afe ane ai sau folasaga i le o’o mai o le feau o le Talalelei i si o tatou Atunuu o Samoa. O loo manino le fesoota’iga o le ‘amataga o se laasaga fou’ ma le ‘auina mo le feau,’ pei o le mataupu.’ A e tolu ni vaega taua o lo’o taoto i le auina mo le feau, pei ona silafia ala o faaso’ota’iga. Ia malamalama le vasega i vaega ia e tolu: 1. O *le e ana le feau*; o le Atua lava e to’atasi. 2. O le *avefeau*; soo se tagata ua filifilia e le Atua. 3. O le *ave i ai le feau*; mo tagata uma o le lalolagi. Tau ina manatua, o mea tau i le Atua e i ai lana pule faitalia. E pei o ona ala e mamao ese ma ala o tatou tagata. E le gata i le pule aoao a le Alii i lana feau po o Galuega, ae o loo manino mai foi lana pule i mea uma lava e oo foi ia i tatou le tagata na ia faia.

**Fesoasoani mo le Mataupu:** O tala i ‘Galuega’ a le au aposetolo, o le ata manino foi lea o le mataupu pei ona feagai i lenei taeao. O ‘avefeau ua auina e molimoli le feau o le Talalelei, ua filifilia ma saunia e le Atua lava ia. O loo atagia mai ai le eseese o le vaaiga faa-le tagata ma le silafaga a le Atua e ana le feau o le Talalelei. Afai e sa’o le manatu a le au popoto o le Feagaiga Fou o loo faaauauina tusitusiga a Luka i le tusi lenei i Galuega a le au aposetolo, o lona uiga o loo manino le tusitala i Lē e ana le Galuega. O loo malamalama lelei foi Luka i le avea ai ma avefeau o le Talalelei. Auā o ia o le tasi na molimautino i galuega a le Alo o le Atua, o Lē na aumaia le faataitaiga sili ma le uiga moni o le feau a lona Tamā i le lalolagi.

**Tauloto:** *Galuega 13:22; Ona faatuina lea e Ia o Tavita e fai mo latou tupu; ua ia molitino foi ia te ia, ua faapea ane, ‘Ua ou maua Tavita le atalii o Iese, o le tagata e tusa ma lo’u nei loto, na te faia o mea uma lava ou te mana’o i ai.’*

**A’oa’oga:**


- Ia tautuana o avefeau a le Atua i tatou, e ao ina faamaoni ma maua’a le faatuatua i le Alii.
- O le finagalo o le Atua lea ua avea ma feau o le Talalelei, e ao ona so’o ai tulimanu e fia o lenei lalolagi. Ia avea i tatou ma avefeau faatuatuaina o le Talalelei a le Atua.

**UIGA O UPU:**

- ❖ Olopalaina: O se mea po o se tagata ua sauāina, faapologaina ma ua oloina i lalo.
- ❖ Molitino: O lē molimau na i ai tino i le mea na tupu lea ua molimau atu ai.
- ❖ Āumau: O le *nofo ai* po o le mea e *alala ai* le tagata.

**Pese:** # 253: Tala’i atu i nuu ese le Talalelei...

**Tatalo:** Ia faamanatu pea i lau fanau le soifua valaauina mo lau feau ma le galuega, lele ua filiilia ai; ae ao ina tutumau ma viia pea le Matai o le galuega. Amene.



MANATU AUTŪ O SETEMA: “AMATAGA O SE LAASAGA FOU.”

SETEMA 12, 2021

MATAUPU 5: “FIAFIA INA UA AMANAIAINA” (Excitement of inclusion).

TUSI FAITAU: GALUEGA 13: 42 – 52.

SINI: Ia manino le fanau i lagona fiafia o tagata o nuuese i le feau o le Talalelei, o le faafetai ina ua amanaiaina i le Faaolataga a le Atua.

**Fesoasoani mo faiaoga:** Ia manatua pea vaega e tolu o ala o fesoota’iga, pei ona filifilia ai avefeau o le Talalelei. O se laasaga fou le o’o atu o le feau taumolimoli a le Atua i nuu ese; auā pei o le manatu mauuluga lava lea o le Isaraelu po o le au Iutaia, ua na o i latou e fitōitōnu i ai le feau o le Faaolataga. Peitai, e mamao lava lea manatu ma le finagalo o le ana le feau. O le Atua lava Ia e mo le lalolagi atoa, e mo tagata uma. Na fesoasoani tele le Agaga o le Atua i galuega a le au aposetolo po o avefeau o nu’u ese, e tala’i atu le Talalelei ia Iesu Keriso le Alo o le Atua soifua. O le ‘feau’ o le Faaolataga na tau-fafofi atu i nuu ese e ala i le galuega mana a le Agaga o le Atua. O le fiafia tele foi lea o nuu ese auā lele ua faitaulia ai ma i tatou i le Talalelei a le Atua. Ioe, faafetai ona o le amanaiaina o i tatou i le feau, ua maua ai se avaanoa mo lana Faaolataga.

**Fesoasoani mo le Mataupu:** O le molimau a Luka pei o le tusi faitau, e maofa ona o le mamana o upu ua tautatala ai Paulo ma le au aposetolo, a’o aga atu le Talalelei i nu’u ese. Ua amata ona matata’u le au Iutaia ona o le vave taliaina e tagata o nuu ese o le Talalelei i le feau tau-molimoli a le Atua i le lalolagi. E moni na tele fitā ma faafitauli na feagai ma le au aposetolo o le Talalelei mo nuu ese, ae na faigofie mea uma i le fesoasoani o le Agaga o Lē e ana le feau. Na fiu le au Iutaia e tau faasesē le Talalelei, ae ua faa-manaina gutu ma upu a aposetolo o nuu ese. I le *f. 47 & 48* “Auā ua faapea ona poloai mai o le Alii ia te i matou, Ua ou tofia oe e fai ma malamalama o nuu ese, ina ia avea oe ma faaolataga e oo i tulu’iga o le lalolagi. Ua faalogo tagata o nuu ese, ona latou olioli ai lea, ma vivii atu i le afioga a le Alii.

**Ia faamalalama uiga o upu o le Tusi Faitau:**

- ✓ Sunako: O le maota tapua’i po o le Falesā i taimi o Iesu.
- ✓ Tu’uvaa: O le malaga ese atu i le va’a.
- ✓ Tulu’iga: O vaega po o itulaga e atoa ai le lalolagi.

**Tauloto:** *Galuega 13: 47; “Auā ua faapea ona poloai mai o le Alii ia te i matou, “Ua ou tofia oe e fai ma malamalama o nuu ese, ina ia avea oe ma faaolataga e oo i tulu’iga o le lalolagi.”*

**A’oa’oga:**

- Ia tautuana lo tatou ola valaauina mo le feau ma le galuega a le Atua i taimi uma.
- Ia faalagolago ma mulimulita’i i le musumusuga mana a le Agaga Paia.
- Ia faatalitali ma saili pea i le Atua mo le tonu o lana feau ma le galuega mo i tatou.

**Pese:** Tusi Pese # 253: Tala’i atu i nu’u ese.

**Tatalo:** Ia avea pea i matou ma au avefeau o le Talalelei, ma faamalasia e le Agaga Paia i matou se’ia soo tulu’iga uma o le lalolagi nei. Amene.





**MANATU AUTŪ O SETEMA: “AMATAGA O SE LAASAGA FOU”**

**SETEMA 19, 2021**

**MATAUPU 6: “ALOFA TUNOA SILISILI O LE ATUA”  
(God’s astounding grace).**

**TUSI FAITAU: GALUEGA 15: 1 – 11 / 28-29**

**SINI: Ia malamalama le fanau i le manatu; ua lava ma totoe le alofa tunoa e ala ia Keriso Iesu e faaolaina ai le tagata, tusa pe lē peritomeina.**

**Fesoasoani mo faiaoga:** E i ai le faaupuga tau faasesē e faapea; ‘na afio mai Iesu e talepe le tulafono.’ O faaupuga a tagata e faatatau i le faasa’oina e le Alii o tulafono ma poloa’iga ina ia aogā mo le soifua o le tagata. Ua faa-atoatoaina e Iesu tulafono mo le ola e tatau ai mo le tagata soifua. E i ai nisi o tulafono mai le Feagaiga Tuai; pei o le ‘peritomeina’ e faaolaina ai le tagata. Ua lē toe tāua lea poloaiga; ua na o se ala e faamamāina ai le tagata, ae lē atoa ai lona faaolataga. O le tele o poloaiga e tumau le faavae a ua suia e le Alii mo le leleiga o le soifuaga i aso fai soo, peita’i ua faa-leleia ma faa-atoatoa ai le tulafono a le Atua mo tupulaga fai a’e.

**Fesoasoani mo le Mataupu:** O le tasi leni o mataupu tugā i le galuega a Paulo i nuu ese, e faasaga i ta’ita’i o le lotu Iutaia. Fai mai i latou, ‘o le ‘Peritomeina’ e faaolaina ai le tagata, pei o le manatu i aiaiga o le tulafono’. Peita’i, lea ua faa-atoatoaina e le Alii e ala i le galuega o le ‘Faaolataga.’ O le ‘alofa tunoa’ foi o lona Tamā, ua lava lea ma totoe e sao fagā ai le tagata i le Malo e faavavau. E ala i le salamō ma le faatuatua moni i le Alo o le Atua na maliu ma toe soifua manumalo mai le oti ma le tuugamau. O le manatu faaituau ma le faapito o le au Iutaia; lea faato’a latou aputiputi i le ‘Faaolatga’ ina ua mae’a ona faatinoina, peita’i na manino lo latou lē taliaina le Mesia o le tupu o tagata Iutaia na aumaia le galuega o le Faaolataga. O lea ua faasa’o e Paulo ma toeiina i Ierusalem ma le mataupu ona o le fesoasoani o le Agaga Paia ia i latou.

**Tauloto: Galuega 15: 11; A e peitai ua tatou taofi, o le ‘alofa tunoa’ o le Alii o Iesu Keriso e faaolaina ai i tatou, faapei o i latou lava.”**

**A’oa’oga:**

- Ia tatou tutumau i le Atua; ae taumamāo ma le tiapolo ma ana mailei.
- O le soifua ma le ola e tatau ai mo tatou tagata; e tonu ma sa’o mea uma i le Atua.
- Ua na o le faatuatua i le Keriso Toe Tu le alofa tunoa o le Atua e faaolaina ai le tagata.

**Upu ma o latou uiga:**

- ❖ Taumamāo: O le tutu mamāo mai le mea e tatau ona i ai.
- ❖ Mea titina: O se mea ola e titina pe a tapē (tulou).
- ❖ Faanoono: Toe faaopopo se isi avega ma toe faatigāina.

**Pese: # 137: Le Faaola e, ua ou sau nei....**

**Tatalo: Le Atua mamana e, ia faia pea lou finagalo ma ia faamalamalamaina le pogisa o lau fanau e lou Agaga Sa; ina ia atoatoa ma tonu ai lo matou ola i lau Afio e lē aunoa. Amene.**



**“MANATU TAITAI O SETEMA: “AMATAGA O SE LAASAGA FOU.”**

**SU’EGA MO LE MASINA O SETEMA**

**SETEMA 26, 2021**

**TUSI FAITAU: GALUEGA 13: 16-31 / GALUEGA 13: 42-52 / GALUEGA 15: 1-11/28-29**

**Fesoasoani mo faiaoga:**

**Mataupu 4: fesili 1–4 / Mataupu 5: fesili 5–7 / Mataupu 6: fesili 8–11.**

**Fesili ma Tali** (pule lau susuga pe sui fesili/o tali foi ia e mafai ona e faaopopo i ai).

1. O ai e ana le feau lea ua valaauina ai tagata uma? *T:* O le Atua lava e ana le feau ma le galuega o loo ua filifilia ma valaauina ai i tatou.
2. O ai le fesoasoani sili i le avefeau pei ona ta’ua e le mataupu? *T:* O le Agaga Paia o le Atua o le fesoasoani sili lea mo le avefeau pei ona molimau Luka i le tusi o Galuega.
3. O le ā tonu le feau tau-molimoli a le Atua mo le avefeau? *T:* O le feau o le Talalelei ia Iesu Keriso ma le finagalo o le Tamā ia tausia ana tulafono ma anaana i ana poloaiga.
4. O fea e ave i ai le feau a’o le a foi le umi e momoli atu ai? *T:* O le feau mo tagata ola uma o soifua ina ia so’o ona taiao; pe ia so’o tuluiga uma o le lalolagi.
5. O ā lagona na tutupu a’e i tagata o nuu ese ina ua latou faalogo i le feau a le Atua? *T:* Ua matuā fīafia ina ua amanaiaina i latou e le feau o le ‘Faaolataga’.
6. A’o ā manatu o le au Iutaia e uiga i le ‘Faaolataga a le Atua? *T:* E manatu lava le Isaraelu po o le au Iutaia ua na o i latou e fitōtonu ma agavaa i le faaolataga.
7. Pe na faigofie ona molimoli atu le feau i nuu ese ona o manatu faapito o le au Iutaia? *T:* E le’i faigofie mo avefeau o le Talalelei, ae na faamalosia e le Agaga o le Atua le galuega Tala’i mo nuu ese.
8. O le ā le uiga o le ‘Peritomeina’? *T:* O tu ma le aganuu faa-Iutaia mo tamatane ina ia faamamaina ai; ae manatu i latou e ao ona peritomeina ina ia ‘faaolaina’ ai.
9. O le ā le finau a le aposotolo o nuu ese i le mataupu lea o le ‘peritomeina ma lona taua? *T:* “O loo manino le manatu o Paulo e uiga i le ‘peritomeina’ o tama tane; ua na o se faamaufaailogaina ma e faamamaina ai, peita’i e lē faaolaina ai se tagata”.
10. O le ā le uiga o le alofa tunoa pei ona finau mai ai le mataupu? *T:* “O le alofa tunoa e patino i le Atua, ina ua auina mai le Alo pele e to’atasi e osi ai le taulaga o le faaolataga.”
11. O le ā le manatu o le aposetolo na finau ai ma faresaio? *T:* E leai lava se isi mea e toe faaopopo i le ‘Faaolataga,’ a ia faatuatua i le alofa tunoa o le Tamā e ala ia Iesu Keriso.

***Ia manuia tele le faigā-suega, aemaise malologa o le Lotu-a-Tamaiti.***



**MANATU TAITAI O NOVEMA: “OU TE TULA’I ATU NEI” (Here I stand).**

**NOVEMA 07, 2021**

**MATAUPU 7: “O LE ALOFA TUNOA UA TATOU TUTU AI”  
(This grace in which we stand).**

**TUSI FAITAU: ROMA 5: 1 – 11.**

**SINI: Ia iloa e le fanau le tāua o le alofa tunoa o le Atua e ala ia Iesu, e mafai ai ona tatou tutu auā o lo tatou ala lea i malo ma lana faaolataga.**

**Fesoasoani mo faiaoga:** E tali aiga lelei lava le mataupu lea ma le mataupu ua se’i mavae atu, pei ona finau le aposetolo o nuu ese. O le mitamitaga tele o le tagata talitonu ina ua ta’uamiotonuina ma faaolaina, ona o le faatuatua i le Alo o le Atua na maliu ma toe soifua mai le oti ma. Ua mamā ai puapuaga, ina ua iloa o puapuagā e tupu ai le onasa’i, o le onosa’i e tupu ai le mautinoa, o le mautinoa e tupu ai le faamoemoe, o le faamoemoe foi e le mā ai e tula’i. Ioe, o le tusi lenei na auau i ai le tupoupou a Matini Luteru i lana tula’i atu i luma o tagata, na faaoga ai le mataupu lenei i le alofa tunoa o le Atua e atoatoa ai taumafaiga a le tagata talitonu.

**Fesoasoani mo le Mataupu:** O le tusi a Roma o loo sasa’a atoa ai le tomai o Paulo pei ona tatou faitauina i lenei taeao. O le naunautaga o le aposetolo ina ia taliaina lana talosaga mo se isi ana malaga i lalo o nu’u ese. O loo faamalosi atu Paulo mo le faaolataga e ala ia Iesu Keriso; i lona maliu ma lona Toe Tu manumalō mai le tuugamau ma le oti, o le tunoa lena o le alofa o le Tamā o i le lagi. O lea foi ua tatou tutu ai e tusa ai ma le mau o le Talalelei.

**Tauloto:** Roma 5: 1; ***O lenei, ua ta’uamiotonuina i tatou i le faatuatua, o lea ua tatou lelei ai ma le Atua, ona o lo tatou Alii o Iesu Keriso.***

**A’oa’oga:**

- O le tāua lea o le ola talitonu ma le faatuatua i le alofa tunoa e faaolaina ai.
- E tāua galuega lelei peita’i, o le faatuatua i le faaolataga na saunia e le Atua e ala ia Iesu Keriso ua lava lea ma totoa mo le au talitonu e faaolaina ai.
- Ia manatua o le Atua ua tatou maua mai ai le lelei e ala ia Iesu Keriso.

**Galuega Faatino:**

- ❖ Galuega e ave i le fale: ia tusi mai se l-laupepa e uiga; ‘alofa tunoa’, ia faamatala atili le uiga o le upu, ina ia iloa uma e le vasega, aiseā foi ua mafai ona faaolaina ai le tagata agasala e ala i le alofa tunoa? Ia faafo’i mai i le Aso Faraile mo le aoga i le Aso Sa.

**Faamatala uiga upu nei:**

- ✓ Ta’uamiotonuina: O le tagata ua ta’u ua amiotonu ona o le faatuatua.
- ✓ Faalemata’u: E pei e lē usita’i ma lē mata’u i poloa’iga ma tulafono.
- ✓ Ta’usalaina: O le tagata ua ta’u-sala ona o le solitulafono po ua agasala.

**Tatalo:** Ia faamanatu mai pea i fanau le ala i malo; o le talitonu ma le faatuatua i le faaolataga na maliu tigā Iesu aemaise lona toe soifua manulalo mai le oli ma le tuugamau. Amene.

***Ia manuia tele tapenaga o lenei Aso Sa.***



**MANATU TAITAI O NOVEMA: “OU TE TULA’I ATU NEI”**

**NOVEMA 14, 2021**

**MATAUPU 8: “PE A MOE MITI TOA MANUMANU”**

**(When superheroes dream).**

**TUSI FAITAU: ROMA 6: 1 – 14.**

**SINI: Ia iloa e le fanau e ao ina tatou tutu faatasi ma manatua toa na asā le gasū o le Talalelei, lea ua tatou aeae i a latou miti ma galuega.**

**Fesoasoani mo faiaoga:** O le tasi lenei o toa manumanu o le Talalelei i le Feagaiga Fou, o Paulo e lē o se tasi o le 12, peitai o ia o le toa na filifilia sa’o mai e le Atua i le ala i Tamaseko. E ui i lona sauā i le Talalelei, a e na feliiua’iina e le Atua ma avea ma ipu ma va’a o lana galuega i nuu ese. O le tagata e faamaoni i le ola ua fultua mai le leaga, a ua ola i la le Atua ma lona finagalo. O le malosi lea o lana molimau, auā o loo faatino ma molimau i ai lona sofua tautua i le Talalelei aemaise le galuega tau faaofi atu i nuu ese. E tele isi toa manumanu o le Talalelei i le Tusi Paia.

**Ia faamalamalama uiga o upu o le Tusi Faitau:**

- ✓ Tuinanau: O le mana’o tele po o le tagata ua lē malie i mea ua ia te ia.
- ✓ Tuusaunoo: O le tagata ua tuu faitalia po ua leai se pule ai.
- ✓ Toefuataina: O le ola ua toe faafouina/fuataina.

**Fesoasoani mo le Mataupu:** O loo tatou i ai lava i le tusi a Roma i le ma’ema’eā o Paulo e tau faamatala le soifua o le tagata talitonu po o le kerisiano i le vaitau o taufaaofi atu i nuu ese le Talalelei. E foliga mai o le finau a le aposetolo ina ia manino le lotoifale po o le luitaia kerisiano i aiaiga o le ‘faaolataga’ ae lei momoli atu i nuu ese. O loo talanoa mai lona poto masani po o mea ua a’oa’oina ai o ia e faasoa atu ai i kerisiano o nuu ese. O le toa manumanu o loo tautala i le mea o loo soifua ma ola ai i le olaga nei, ma ua tusa ia Paulo pe fasiotia ai ona o le Talalelei; auā ua manino ua oti o ia ona i la le agasala; peita’i ua ola lava i la le Atua e ala i le maliu o loo tatou Alii o Iesu. O le toa ua talai ofu-tau faafitafita a ua faaofuina e le Atua i aupega o le Talalelei.


**A’oa’oga:**

- ❖ Ia tatou o ese mai le agasala ma ona tu’inanau, ae soifua i la le Atua.
- ❖ Ia mautinoa e lē pule le agasala ia te outou, auā ua outou lē nonofo i le tulafono a o le alofa tunoa o le Atua.
- ❖ E iloa le toa manumanu o le Talalelei i ana upu; auā e ola ma savali ai pei o le aposetolo.

**Tauloto: Roma 6:12-13; “O lenei aua nei malo le agasala i o outou tino auagavale, i lo outou gauai i ai i ona tu’inanau; aua foi nei tuuina atu o outou tino i le agasala e fai ma aupega a le amio leaga; a ia outou tuuina atu outou i le Atua, e pei o e ua ola nai e ua oti, ma ia tuuina atu outou tino i le Atua e fai ma aupega a le amiotonu.”**

**Tatalo:** Le Atua e, faamanatu mai pea galuega a toa manumanu o le Talalelei, o e na meomiti ina ia so’o tuluiga o le lalolagi i le tunoa o lou alofa mo lau fanau. Amene...

***Ia manuia tele tapenaga ma a’oa’oga o lenei Aso Sa.***





**MANATU TAITAI O NOVEMA: “OU TE TULA’I ATU NEI” (Here I stand).**

**SUEGA MO LE MASINA O NOVEMA**

**NOVEMA 28, 2021**

**TUSI FAITAU: ROMA 5: 1-11 / ROMA 6: 1-14 / ROMA 7: 1 – 12**

**Fesoasoani mo faiaoga:**

**Mataupu 7: fesili 1–4 / Mataupu 8: fesili 5–7 / Mataupu 9: fesili 8–11.**

**Fesili ma Tali** (pule lau susuga pe sui fesili/o tali foi ia e mafai ona e faaopopo i ai).

1. O le a le uiga; ‘o le alofa tunoa e tatou tutu ai? **T:** Ua malosi ma maua’ a le tulaga ua oo i ai le soifua kerisiano ona o le alofa tunoa o le Atua ma le Talalelei ia Keriso Iesu.
2. Aiseā ua ta’uamionuina ai i tatou i le faatuatua? **T:** Auā foi pau lea o le ala e taliaina ai le galuega o le faaolataga a le Atua i la le Talalelei o le ‘faatuatua’.
3. O le a le upu a Paulo e uiga i puapuaga? **T:** O puapuaga e tupu ai le onosa’i, e tupu ai le mautinoa, e tupu ai le faamoemoe, o le faamoemoe foi e lē mā ai.
4. E mitamita le tagata i le Atua aiseā? **T:** O la Paulo, ‘e mitamita i le Atua ona o le Alii o Iesu Keriso; o Ia ua tatou maua ai le nei leleiga.
5. O le a le uiga o le fetalaiga a Paulo e uiga i le papatiso faatasi ma Keriso? **T:** Ioe, o le maliu o Keriso na papatisoina ai tagata uma; ina ia toe fuataina i tatou i lona Toe Tu.
6. O ai le toa manumanu lea e tautala i ai le mataupu? **T:** O le aposetolo o nuu ese po o Paulo ona ua iloga ona manatu e uiga i le Talalelei ia Keriso Iesu.
7. O a faanaunauga o le aposetolo o nuu ese mo le au kerisiano i Roma? **T:** “Ina ia maua’ a lo latou faatuatua i le Talalelei ma ia tumau le ola i la le agaga.”
8. O le a tonu le uiga o le mataupu; ‘O ala o le Agaga? **T:** E mana’omia lava e le tagata le fesoasoani a le Agaga o le Atua i fitā ma puapuagā latou te fetaia’i pea i le ala.
9. O le a le tulafono i le fafine pe a toe fai se isi ana tane? **T:** “E lē mafai ona toe fai se isi ana tane pe afai o loo ola pea lana tane i la le tulafono”.
10. O le a le faatusa a Paulo na ia aumai ai le fafine ma lana tane? **T:** “Ua faatusa e le aposetolo le tulafono i le va o le fafine ma lana tane e pei o le Keriso ma le au Kerisiano i lona vaitau; e femoumoua’i, ma avaga gofie i atua ese ma atua mamate.”
11. O le a se a’oa’oga o le mataupu i le soifuaga o loo tatou ola ai nei? **T:** O le tele o taimi e matuā mana’omia ai le Agaga Paia e tautoaluaina lo tatou auagavale ma le faatauva. E ao foi ona tatou faatagaina le galuega mana a le Agaga e fesoasoani i o tatou vaivaiga.

***Ia manuia tele le faigā-suega o lenei Aso Sa.***



**MANATU TAITAI O TESEMA: “FEAGAIGA MA FOLAFOLAGA”**

**TESEMA 05, 20201**

**MATAUPU 10: “O SARA MA MARIA” (Sarah and Mary).**

**TUSI FAITAU: KENESE 18: 1 - 15**

**SINI: Ia iloa e le fanau o folafolaga e momoli mai e le auauna a le Atua, e faamaoni lava ma e lē gausia ia feagaiga.**

**Fesoasoani mo le Faiaoga:** Ia mautinoa o le feau mai le Atua po o ana folafolaga foi e faamaoni lava lea, e lē mafai ona olegia e le Alii se mea ua fetalai i ai. O le tele o ia feagaiga na osia e le Isaraelu ma lo latou Atua, e lei gausia lava pe na suia e le Alii. Peita’i, na tele ina gausia ma soloia e le Isaraelu feagaiga ma folafolaga a lo latou Atua e to’atasi. E i ai foi nisi o folafolaga e pei ona i ai lenei taeao, ia e leai lava so i tatou e le masalosalo ai ona o le ofoofogia o mea e mafai pea e le Atua ona faatino i luma o le tagata. E foliga mai e ao ona tatou saili po le feagaiga moni lea mai fofoga o le Atua, ona leai lea o se popole ae mautinoa lava e taunuu pei ona folafolaina.

**Fesoasoani mo Mataupu:** O le tala masani le tusi faitau o lenei taeao, e moni na ataata Sara ona o le malie o le folafolaga a nei agelu. Peita’i ua galo i le loomatua o le Atua lea ua fetalai mai e ala i le folafolaga o le tama tane o le a fanau mai ia te ia. O loo faaaogaina e le Alii feagaiga ma folafolaga ia nofouta i ai le tagata, aemaise ina ia maua’ a le talitonu; e leai se mea e faigata i le Atua. O ona ala foi e le masu’esu’eina ma lona mata’utia e uiga ese ma le mamalu.

O lea foi le folafolaga na o’o ane ia Maria le taupou ona o le pepe o le Kerisimasi. O le feagaiga lē gausia a le Atua ma le lalolagi na folafolaina i le Feagaiga Tuai, lea ua faataunuuina i le Feagaiga Fou lona faamaoni ia Maria. O le pepe o le Kerisimasi na folafolaina e le Agelu a le Atua ia Maria pei ona lauivilu ai le au Kerisiano. Ia manuia le aga atu e faamanatu le pepe o le Kerisimasi ma o le folafolaga a le Atua ia Maria, e pei o le feagaiga ia Isa’ako le tama o le folafolaga na te faaauuina le gafa o Iesu i le lalolagi.

**Faamalamalama uiga o upu o le tusi faitau:**

- ✓ Mu’amu’a: O le aano o se manu ua vaivai e iloa ai le laititi.
- ✓ Tuupoina: O le aso lea ua tuu po ma ua atofaina.


**Tauloto: Kenese 18:14; “E i ai ea se mea e faigatā i le Alii? O ona po ua tuupoina ou te toe foi mai ai ia te oe, i lelā tausaga, e maua mai ai e Sara le tama tane.”**

**A’oa’oga:**

- Ia mau le toovae i le Atua; saili i le ia te Ia mo se fesoasoani i feagaiga osia.
- Ia tatou usitai ma tausia pea feagaiga na osia ma le Atua e manuia ai le lumana’i.
- Ia mautinoa e leai se mea e lē mafai e le Atua o loo tatou tapua’i ma talitonu i ai.

**Tatalo:** Le Atua mamana e, ia totoina i loto o le fanau lou faamaoni i feagaiga osia i le tele o aso, se’i a’oa’o ma faatonu mai i matou faitauina manuia mai lau Afio e faavavau. Amene...

***Ia manuia tele tapenaga ma a’oa’oga o lenei Aso Sa.***



## SUEGA FAAI’U O LE TAUSAGA

TESEMA 12, 2021

TUSI FAITAU: Tusi faitau uma o leni afa-tausaga aoga.

**Fesoasoani mo Faiaoga: e ta’i lua mai fesili i suega ua mae’a o mataupu ta’itasi e 10.**  
**Fesili ma Tali: (*pule lau susuga pe sui fesili/o tali foi ia e mafai ona e faaopopo i ai*).**

1. O le a le uiga; ‘o e na savavali i le pouliuli lea ua pagatia ai le lumana’i? **T:** Ioe, e i ai taimi tatou te lē iloa ai o tatou sese, ae faamanatu mai ina ua faasalaina i tatou e le Atua.
2. I le mataupu e 9 o le a le manatu o le tusitala ia Isaraelu? **T:** O le vaitau o loo aeae le manuia o le nuu o folafolaga, ua agasala ma solia tulafono ma poloaiga a le Atua.
3. O le a le uiga; ‘pea leai se alofa e maua i fea le lelei? **T:** Ua na o le Atua e tonu ai lea faaupuga; ‘auā o le alofa lava Ia ma e silisili lona lelei i mea uma e manatu i ai.
4. O le a le uiga; ‘ou te utuvai ma le olioli i vaipuna o le faaolataga? **T:** O a fita ma faigata e o’o mai; o le Atua lava e malie ai le galala o le tagata ua fai ma vaipuna o le faaolataga.
5. O le a le mea o le faia e le Atua ia Isaraelu pei ona faamanatu Isaia? **T:** O le a sasaina e le Alii le nuu ia uma, na te faafaōina, na te faataapeapeina foi e o nonofo ai.
6. O le a se faamanatu, pe afai e tausia ma usitaia tulafono a le Atua? **T:** Ua pei o se fanua lanulauava, e maua ai le fiafia moni ma e faamalie loto.”
7. O ai e ana le feau lea ua valaauina ai tagata uma? **T:** O le Atua lava e ana le feau ma le galuega o loo ua filifilia ma valaauina ai i tatou.
8. O ai le fesoasoani sili i le avefeau pei ona ta’ua e le mataupu? **T:** O le Agaga Paia o le Atua o le fesoasoani sili lea mo le avefeau pei ona molimau Luka i le tusi o Galuega.
9. O ā lagona na tutupu a’e i tagata o nuu ese ina ua latou faalogo i le feau a le Atua? **T:** Ua matuā fiafia ina ua amanaiaina i latou e le feau o le ‘Faaolataga’.
10. A’o ā manatu o le au Iutaia e uiga i le ‘Faaolataga a le Atua? **T:** E manatu lava le Isaraelu po o le au Iutaia ua na o i latou e fitōtonu ma agavaa i le faaolataga.
11. O le ā le uiga o le alofa tunoa pei ona finau mai ai le mataupu? **T:** “O le alofa tunoa e patino i le Atua, ina ua auina mai le Alo pele e to’atasi e osi ai le taulaga o le faaolataga.”
12. O le ā le manatu o le aposetolo na finau ai ma faresaio? **T:** E leai lava se isi mea e toe faaopopo i le ‘Faaolataga,’ a ia faatuatua i le alofa tunoa o le Tamā e ala ia Iesu Keriso.
13. O le a le uiga; ‘o le alofa tunoa e tatou tutu ai? **T:** Ua malosi ma maua’a le tulaga ua oo i ai le soifua kerisiano ona o le alofa tunoa o le Atua ma le Talalelei ia Keriso Iesu.



14. Aiseā ua ta'uamiotonuina ai i tatou i le faatuatua? **T:** Auā foi pau lea o le ala e taliaina ai le galuega o le faaolataga a le Atua i la le Talalelei o le 'faatuatua'.
15. O le a le uiga o le fetalaiga a Paulo e uiga i le papatiso faatasi ma Keriso? **T:** Ioe, o le maliu o Keriso na papatisoina ai tagata uma; ina ia toe fuataina i tatou i lona Toe Tu.
16. O a faanaunauga o le aposetolo o nuu ese mo le au kerisiano i Roma? **T:** "Ina ia maua'a lo latou faatuatua i le Talalelei ma ia tumau le ola i la le agaga."
17. O le a tonu le uiga o le mataupu; 'O ala o le Agaga? **T:** E mana'omia lava e le tagata le fesoasoani a le Agaga o le Atua i fitā ma puapuagā latou te fetaia'i pea i le ala.
18. O le a le faatusa a Paulo na ia aumai ai le fafine ma lana tane? **T:** "Ua faatusa e le aposetolo le tulafono i le va o le fafine ma lana tane e pei o le Keriso ma le au Kerisiano i lona vaitau; e femoumoua'i, ma avaga gofie i atua ese ma atua mamate."
19. O le a se a'oa'oga o lenei mataupu i folafolaga e ao ona manatua? **T:** Ia tausia folafolaga mai le Atua o manuia, ma e leai se mea e lē mafaia e le Atua.
20. O le a le folafolaga a agelu na ataata ai Sara? **T:** "O ona po ua tuupoina ou te toe foi mai ai ia te oe, i lelā tausaga, o le maua e Sara se tama tane."

***Ia manuia tele le faigā-suega; ma le malologa mo le Kerisimasi ma le Tausaga Fou.***

